

柯竹巖集

心燕題簽

竹麓集卷十一

明詹事府少詹事兼翰林院學士莆田柯潛著

南京戶部主事四世從孫維騏校編

邑庠生員鄉飲賓六世從孫亨

清江南當塗縣知縣九世從孫潮重校梓

邑優行廩生十九世從孫玉樹

福安縣庠生後學丁夢松

碑銘

都察院右副都御史陳公墓道碑銘

嘉議大夫都察院右副都御史邵武陳公以疾卒于家訃聞上惻然遣官諭祭並營葬事其子復以君恩父德皆宜有傳

乃專价致書來屬予爲文將伐石刻于墓道以彰示來世予少慕公名及登朝接公偉論加敬重焉請老歸予送至都門外握手歡言以忠義相期許抵家又寄詩申前意則予雖晚進辱公之知深矣茲文何敢辭按永豐知縣黃永從所著事狀公諱泰字吉亨姓陳氏幼鞠于外祖曹從其姓至爲都御史始請復焉曾祖祿一祖子祥俱不仕父汝桂封中憲大夫都察院右僉都御史母吳氏封恭人公儀度修整言簡而有章淹貫經史喜爲詩永樂癸卯發解鄉闈宣德丁未會試乙榜除直隸安慶府學訓導以育才爲樂正統丁巳廷臣交章薦其賢擢江西道監察御史累奉命巡按貴州山西山東諸藩克振風紀奕奕有重名在貴州都指揮宮聚素桀驁聞公

召才敢肆其如大軍征麓川歲取土兵二千爲向導將士或
失利輒殺土兵以爲功公奏罷之夷人仰戴如父母越數月
召還調陝西道諸道有疑獄皆以決於公無或稱冤者在山
西會南北圻旱澇相仍詔下求言眾皆以爲天災公獨援洪
範庶徵咸由人事由是罷大臣不職者凡數人公又奏山西
藩憲及州縣官之貪殘者悉置之法在山東以藩憲多匪人
陳疏懇懇數千言大要以選賢去奸爲治本上嘉納之擢四
川按察司按察使不踰年蜀大治鎮守都御史寇深忌公才
名陰譏所私叅議陳敏誣奏公杖殺人遂下刑部獄其人實
自溺水死久而始白復官已巳虜寇內侵命公協同將臣守
備紫荆關及巡視沿邊諸寨景泰改元陞大理寺右少卿守

備白羊口轉都察院右僉都御史鎮守易州節制紫荊倒馬等關及沿河關口三十六處公早夜究心畫計忘其勞虜知有備遂遁去又考察大名廣平順德河間諸府衛官吏去留咸當人心旣而三上章辭位不得命益勤勵以圖報稱甲戌陞左僉都御史疏理徐州呂梁二洪及臨清濟寧諸處河道丙子巡撫蘇松常鎮及嘉湖諸大郡蒞下嚴而不苟爲政清明吏不能高下其手以侮公法天順改元以讒言左遷廣東按察司副使連丁父母憂壬午服闋復左僉都御史加賞資巡撫四川蜀中老稚皆熟公名聞公至奔走相告曰曹憲使復來吾屬其將安以嬉乎州郡吏望風解組者數十人甲申陞右副都御史巡撫淮揚等處兼督漕運軍民皆安之成化

改元上章乞歸詞甚切上念其効勞有年賜允薦紳大夫咸
□□□亭車蓋塞途都人聚觀以爲榮家居五年卒□□□
十二月二十二日也距生永樂改元二月十九日享年六十
七配王氏封恭人先公七年卒子男一復讀書飭行有父風
女二長適吳孟誠次適義官高瑤墓去家五里許卒之明年
十二月吉葬公天性孝友常慕鄉先哲李忠定公之爲人平
居謹默如不能言在朝廷論事纏纏如倒囊出珠指斥權奸
無所顧忌累奉命保障重地積有助勞未嘗有矜耀之色聞
官吏無行檢者怒目切齒必去之乃已以此被讒貶斥其志
不少回致仕歸囊無長物閉戶理舊書里巷之人罕見其面
間出遊山水間哦詩酌酒自適而忘其家之匱乏也學士安

成彭公嘗與予論人物予謂清操如公閩中少有彭公笑曰
何止閩中予又嘗於廣坐中聽人論時貴賢否至公無少疵
議蓋公之志行素孚於人故爲公論所許無間言士君子方
望其大用以究厥施而公未及致仕之年決於引去此其始
終全德古人所謂知止不殆者尤爲世所高焉方遘疾語其
子曰死生有命無足悲者慎勿舉僧道追薦之事庶以化乖
俗也翼日正衣冠肅然而逝所著詩文有拙菴集奏議藁武
陽志藏於家塾銘曰

繫陳之先世有顯聞公也嗣興益振其芬
定公仰遺風持行醇正儒術發身司教泮庠以道率人多就
才良廷臣交薦乃陞柱史論事風生聞者喪匕再陞憲使往

蒞蜀川威行澤沛一方晏然少卿都憲累躋峻秩帝心孔嘉
寔賴汝彌將命于外歲靡遑寧撫民禦虜所至有聲中邁讒
言仆而復起天子聖明保公終始公彌效績仰報休恩惟恭
惟敬夙夜弗諼名遂身退乃天之道徜徉林邱以佚其老年
六十七以壽考終錫祭與葬蓋旌其忠君子之榮匪德曷有
刻辭于珉式昭永久

刑部右侍郎李公神道碑銘

嘉議大夫刑部右侍郎李公旣以天順辛巳十二月初六日
葬縉雲縣北西湖山先塋之次越五年爲成化乙酉公之妹
婿且嘗從學者監察御史趙璉至自南京具公官世行治介
其鄉友吏部郎中鍾景清詣予求銘以作公碑蓋予傾慕公

久矣而得托名墓上之石以傳是所願也故爲序其實而系以銘公諱棠字宗楷姓李氏號蒙齋其先自永嘉之獨山徙仙居至公曾大父諱德大仕元爲縉雲美化書院山長樂其湖山之勝考宅以居遂爲縉雲人大父諱璫父諱襲俱以公故贈通議大夫刑部右侍郎大母黃氏母應氏俱贈淑人繼母楊氏封太淑人公篤學通諸經尤深於易宣德丙午舉鄉試爲易經魁庚戌中進士第詔歸進學於家執經門下者甚眾遭父喪一以文公家禮從事處苦塊中悲惋之意久而猶新正統丙辰爲南京刑部河南司主事治獄寬而不縱有善譽於時已未廷臣建存省京儲之議詔六卿減部屬官其法當視才優劣而進退之尙書施公懼賈憎於人以入官先後

爲去留公遂需次南還事太淑人甚謹置別業多植佳花木而菊爲多扁曰菊庄時嘯咏其中悠然有陶靖節之趣壬戌以刑部尙書魏公薦復起爲其屬魏去淮陽金公代之性嚴憚公與論事侃侃不少阿金始不悅旣而知其賢遂愛重之薦爲員外郎凡獄有疑必進公相可否以公言而決者十常七八乙丑朝廷隆欽恤之典令法司妙簡公廉詳慎者出錄囚于外金以南圻地廣而獄多遂以屬公公行道逢故人有贈遺悉却之有沈姓者以一銅蟾蜍爲清物強置於舟俟其去徐棄諸水所至廉察幽枉賴以全活者眾畢事方還京復去南京辨重獄絕不以勞勩辭丁卯陞江西司郎中有千戶劉姓者爲部下兵誣告謀逆一家俱逮繫疏戚之屬連坐者

幾百人公悉爲直之劉不敢私謁謝率家人望門羅拜而去
有兄毀其弟家產直二百金者公論其罪比常人減三等眾
以爲失出譁然笑大理亦評不允公援兄殺弟律喻之乃驚
服已已陞侍郎奉命巡撫廣西持法明愼小大百司皆畏威
不敢肆侮其民民歌呼相慶如執熱就涼出阨巖而履亨途
也朔望詣學宮謁先聖退揖諸生親爲講說仁義忠信其言
親切有味聽者無厭褫景泰辛未峒獠出爲寇居民竄匿道
絕行者公督兵捕之民用以寧止朝廷嘉其能有白金綵幣
之賜仍命提督征蠻軍事公益務勤以圖報稱至或忘寢食
尋奉勅簡黜按屬吏之無狀者人服其公都指揮王竑姪殺
土官知府綱並綱二子蓋挾其眾之悍驚以爲無敢誰何公

執置于法竑密遣人賂用事者以計脫公忿鬱不能平又冒
瘴毒成疾甲戌陳疏乞歸少假息于林下旣歸更號嶺南病
叟日奉太淑人遊菊庄上懇懇有愛日之誠間從樵隱鈍齋
二從兄泊二三知己者出遊山水間或卽田夫野老相爾汝
翬然樂中之所懷者悉發於詩詩成輒自歌聲出金石如是
者六年以天順庚辰十二月十四日卒壽六十一配鄭氏累
封至淑人子男二長醇次儼國子生女二長適進士樊貴次
適朱河孫男七女五公爲人嚴重卽之與言則溫然和爲文
章簡而有法有蒙齋集藏于家其持行不苟衣粗食淡終其
身鄉人多化服之不獨其子孫也初予聞公有行誼而已旣
而壽光令楊元齋示予以公爲其父所撰墓誌又知其文之

精乃仰嘆曰有德者必有言信矣哉方其歸也予猶冀公復起爲治朝之光而世之有力者無能知公或知之又忌其高行難合不復以爲言而公竟弗究其施以卒悲夫銘曰

吁嗟李公質厚而醇服今之服其行古人有昭其聲颺于郎署進貳列卿豈謂不遇乃將帝命出鎮南服民歌以嬉吏震而肅蠢茲猺獠寇我邊疆公殲其魁醜孽駭亡帝曰嗟哉嘉汝丕績賚予之腆以勸羣辟公益思奮灑肝披誠倏邁灰疾堙鬱不寧乞骸以歸白駒空谷翠壁丹崖清風穆穆今其亡矣吾誰與從琢辭于石以賁其封

誌銘

封太常寺博士熊公墓誌銘

封文林郎太常寺博士熊公德善蓋一鄉其卒也法應得銘
子監察御史元吉以銘屬予予謝不敢當元吉曰子與我爲
同年子不允銘孰宜銘言已涕絲絲下甚戚予亦爲之惻然
以悲嗚呼置巧命拙元吉豈有利於其間哉公諱原字宗本
成都資縣人父諱應母某氏其先有單特者與王氏結契爲
兄弟因從其姓至公欲復之以未請於朝故猶公王而私熊
也初公居戎伍手一卷不廢以儒號介冑中家貧能積漸以
至充溢人急難有求必隨力以應未嘗避名士過其家率厚
欸及得路絕不復通僦一室於迥絕以居元吉而督之學集
鄉舊賢子弟與同處聘宿學端行者爲之師元吉遂登甲科
爲名進士拜官太常以直聲進臺諫公用太常最得恩封與

配蘇氏孺人偕老享榮養天之錫予善人其信然哉生洪武甲戌七月初七日以天順庚辰七月初十日卒于京得年六十七卒之時諄諄作仁義語意態如常蓋公平生凝性情絕嗜欲死生之分預定於胸中異乎人遠矣元吉奉柩歸故里葬用辛巳十月十二日銘曰

不廢義於窮不易志於貴貞以持之僂夫所畏此予所以悼公不可作而銘公爲無愧也

大理寺左評事井公墓誌銘

致仕大理寺左評事井公以天順六年十二月初四日卒于京城官舍公卿大夫相吊於朝坊隣之倚公以生者哭出涕道路往來人咸嗟嘆曰善人亡矣其孤濙等卜以卒之月二

十四日葬城西玉河鄉豹里之原先事以錦衣衛都指揮使
李君明遠所述事狀介其友錦衣指揮僉事胡君廣川來請
銘公諱田字九疇順德府邢臺人曾祖澄仕元爲總管祖清
甫嘗以武功顯尋棄官歸里居號碧潭人因呼爲碧潭先生
工畫山水求者屢不絕戶外父濬贈徵仕郎禮科給事中母
陳繼劉俱贈孺人公爲人謙厚少爲邑庠生領永樂某年鄉
薦歷任戶兵禮三科給事中言事達大體而畧細故時稱其
賢宣德間朝廷選其子曰源者尙仁廟嘉興大長公主爲駙
馬都尉公遂以特恩進大理寺左評事俾就優閒日惟坐靜
室披閱圖書間從騷人韻士爲觴咏之樂世所謂利者絕口
不談長年居京城意慮簡遠如巖壑中人囊中金取以資艱

窘盡乃已隨有所積復然遇人無賢不肖皆懽然無間而胸
中了不可混衣服無章華持清慎以終其身卒之時訓諸子
一從文公家禮治喪事又從容言守官居家之法乃瞑目生
於洪武丁卯四月十九日得壽七十六配張氏封孺人子男
六駙馬都尉其長也正統己巳秋奉命征北虜奮兵長驅偶
失勢不屈而死追封鉅鹿侯謚榮愍次澤次澧錦衣衛指揮
僉事次潤從長兄死於陣次洪次泰孫男二楚材楚英嗚呼
公累膺光寵而有德以將之淡然若寒素者又有賢子以忠
節死國事其可無銘以詔方來銘曰

有華其秩而端其趨德既厚矣而慶有餘其慶維何篤生令
子荷國之休聯名戚里出入帝廷夙夜匪躬殉國而沒史載